

本朝分省人物考

人物考卷之四十一目錄

南直隸滁徐和廣四州

范常

樂韶鳳

黃立

何文輝

韓青

吳亮

黃純

馬諒

方瑛

劉清

于鏊

戚賢

胡松

以上滁州

朱守仁

高遜志

黃政

孟驥

任蕭

山雲

甄實

馬榮

陳敬

權謹

王弼

蔡楫

張宏

以上徐州

華高

徐義

李隆

耿定

馬應龍

以上和州

錢用任

陳翼

胡虞

李崇謙

濮陽淶

姜洪

李天植

夏良心

以上廣德州

補遺

劉愷

周冕

邵夢麟

王宗顯

呂盛

本朝京省人物考卷之四十一

南直隸滁徐和廣四州

范常

范常字子權滁州人 高皇帝起兵淮上首得滁常  
卽杖策謁軍門留置幕下有所疑卽以問每對輒稱  
旨 上命爲辭以禱上帝有奉天征討慮弗合於天  
心等語深契 上心旣而 上渡江取姑孰常以師  
閩都事贊軍政留姑孰又移毗陵及維揚會姑孰闕  
守遂命常守姑孰以簡易寬厚爲政居三年民親愛  
之旣去久思之猶不忘洪武建元 上銳意於稽古

禮文命爲翰林直學士制禮作樂之事多委之尋以  
病謝去歲餘上念舊臣在者無幾有旨徵詣闕俾  
仍任前職上每宴閒命儒臣列坐賦詩以爲樂詩  
成以獻上笑曰老范之詩質朴而無華殊類其爲  
人尋遷起居注適有足疾數在告上卽傳旨令其  
善自愛又賜以安車俾其出入勿與衆人同時人榮  
之常每自稱瑯琊山人或問曰山人隱者之稱也今  
君朝夕在天子左右爲侍從臣柰何用隱者之稱  
爲乎驟然應之曰士各有志吾今雖忝列從臣抑鄉  
土之念誰能忘之犬馬之齒且益衰暮天子倘賜

不憐首丘之願可終遂矣山人之稱固吾所以志之也未幾力疏致仕以歸

### 樂韶鳳

樂韶鳳字舜儀一字鳴瑞滁州全椒人元末兵起有經世之志乙未年謁太祖於軍門與語竒之是秋扈蹕渡江叅贊機事從下金陵丁酉年授江南行省管勾洪武三年授起居注四年遷給事中尋進中書左司員外郎本年陞兵部侍郎六年陞本部尚書戊午上念天下既定恐中外將卒習於安逸弛武藝命同省臺督府定議教練軍士法凡騎士必善馳射

及用鎗刀步兵必善弓弩及鎗刀凡射十二箭內六箭遠可到近可中者爲中式并定賞罰各有差本年六月改翰林侍講學士與承旨詹同定祀孔子樂章九年編集大明日曆命韶鳳爲催纂官又命擇唐宋名儒表箋可爲式者頒行天下七年上以祭祀還用樂舞前導命翰林儒臣撰樂章以致敬慎鑒戒之意上所撰神降祥神祝惠并酣酒色荒禽荒諸曲凡三十九章曰回鑿樂其辭皆存規諫其舞分爲八隊隊皆八人禮部具圖以上命樂工肄習之八年三月上以舊韻起於江左多失正音乃命韶鳳與諸廷臣



以中原雅音正之書成名曰洪武正韻九月命考陵  
寢朔望節序祭祀禮韶鳳奏漢祖諸廟寢園各有便  
殿日祭於寢月祭於廟特祭於便殿唐園陵之制皇  
祖以上至太祖陵皆朔望上食元日冬至寒食伏臘  
社各一祭欽惟我朝祭祀皇陵舊儀每歲元旦清  
明七月望十月朔冬夏二至日祭用太牢其伏臘社  
每月朔望日則用特羊上俱從之十一月詔定登  
壇脫舄禮韶鳳奏古者侍坐於長者履不上於堂解  
履不敢當階就履而舉之舄於側註云履賤者則不  
敢陳於尊者之側長者在堂則脫於階下長者在室

則着屨上堂而不着入室漢魏以後朝祭則跣襪惟蕭何劔履上殿宋時南郊皇帝至南階脫舄下壇入廟脫舄升殿今議於郊祀廟享前期一日有司以席藉地設御幕於壇東南門外及設執事官脫履之次於壇門外西側祭日大駕臨壇入幕次脫舄升壇其升壇執事導駕贊禮讀祝分獻陪祭官皆脫舄於外以次入壇供事協律郎樂舞生依前跣襪就位祭畢降壇納舄上俱從之尋以病免九年起國子司業十二年陞祭酒上賜諭曰文廟之設是尊先師也故哲王必選名儒以導學者今朕法前代命爾承是

師範闡揚博通使幼者記壯者解毋怠寸陰八月詔  
定 皇太子與諸王往復書劄禮韶鳳考據精詳屢  
蒙 褒答十三年雷震奉天殿 上以羣臣多不職  
罷之韶鳳先以病致仕以壽考終墓在縣西沿村河  
韶鳳爲人和易簡諒弟暉以人才知開封府禮太常  
卿毅諸暨同知均爲世所重云

黃立

黃立滁州人性寬厚有巧思洪武初扈蹕渡江與謀  
軍機除中書省都司尋遷郎中屢著勤勞洪武二十  
三年擢工部右侍郎二十五年以年老致仕

何文輝

吳士元

何文輝字德明滁州人王師取滁州得文輝年始十四上愛之撫育教訓如諸子既長以其材命爲總制遷天寧翼元帥上與陳友諒戰鄱陽湖文輝在行間以功陞同知南昌衛指揮尋進江西行省叅政轉左丞以征南副將軍平福建徵遷京師扈從北巡及取河南復拜河南衛指揮使命守潼關從大將軍西破元擴廓帖木兒軍使攝西安分都督府事加鎮將軍大都督府僉事從潁川侯傅友德取成都以兵戍之陞大都督府同知五年曹國公李文忠北征和

林輝督兵巡居庸關遇疾還卒于家年三十有六  
上悼惜命有司治喪事官給儀物葬之

韓青

韓青全椒人英勇過人且善騎射永樂中 文皇征  
迤北聞其名特命爲前鋒攻殺醜虜賊衆宵遁閱數  
日師駐大城陽和復命青率勁騎襲擊之賊望風奔  
竄宣德改元從 宣廟討武定州旣還賜賚有加明  
年甘延諸羌侵邊命青同總戎征之青才識敏給邊  
備嚴整有古良將風旣還陞山東都指揮僉事操執  
清慎門無私謁暇則與賢士大夫講論古今及將鑑

武經諸書以資聞見嘗駐節臨清總督江淮漕運將士不勞而事集正統十四年秋虜酋也先輩憑陵中國遂致蒙塵賊乘勝長驅履險隘如坦途景泰初詔邊關可通萬馬者悉以重臣守之紫荆關尤重惟青往守而以副都御史孫祥爲監軍青倉卒至關關寬敞多岐路守者恒怯虜猝至咸鼠竄奔潰青招得勁騎百餘諭以忠義當盡死報國衆聞之感泣縱騎突出與賊交戰於升兒灣擊賊數輩已而賊悉衆來迎青手劒之數被創復爲流矢所中屹然不動自午達申轉戰益力賊圍之數重欲招降青大罵曰犍羯狗

奴我背忠義而徇汝乎引劒自刎賊退之三日收屍  
身無完膚顏面如生 上命陞三級以其千承嗣幼  
弱命廩優養于家

吳亮

吳亮滁州來安人初爲青州護衛副千戶永樂元年  
陞旗手衛指揮僉事屢從軍征討宣德五年陞署湖  
廣都指揮僉事尋實授充副總兵總督漕運兼鎮守  
淮安正統間陞都指揮同知以平江西新淦賊功陞  
都督僉事充副總兵佩征南副將軍印鎮守貴州累  
陞右都督尋調鎮守雲南七年召還命視右府事十

石泉先生集卷四十一  
一 年上疏乞致仕 上從其請卒于武岡遣官祭葬  
亮體貌魁梧饒智略屢統軍征討常以不殺爲意所  
至蠻夷懷附性寬簡喜文學至老手不釋卷人以其  
重之

黃純

黃純全椒人永樂中由鄉貢累官兵科給事中疏陳  
時政甚得窾絜陞江西提學副使德行文章爲時稱  
重子璵舉進士授御史卓有能聲

馬諒

馬諒字子諒全椒人宣德壬子領鄉薦癸丑第進士



觀政戶部督賦廣藩授行在吏科給事中數陳時務  
闡切知大體奉使山右藩土恪謹禮儀一無所受正  
統甲子陞山東布政司左叅議景泰辛未陞應天府  
尹天順丁丑陞南京戶部左侍郎三月奉賀闕下陳  
情歸省有寶鑑之賜庚辰召至京蒞事戶部壬午復  
南京戶部癸未滿九載上疏乞骸骨詔許之蓋尹應  
天時嘗忤權貴思有以中傷之久矣至是以老疾爲  
言而諒年纔五十八實未老士論惜之諒爲人精敏  
究心吏治其始至山東也循行郡邑訪庶政得失察  
百司賢否廢興黜陟悉協公議會河決張秋朝廷雖

遣大臣治之然分理之務多出于諒水訖不能爲患  
正統末胡虜犯邊降虜安置山東者欲乘機爲亂朝  
廷憂之以勅諭三司戢民守城諒曰此勅不可使聞  
於衆俄有馳生擒胡寇文移至者乃集衆諭之衆咸  
帖服民有感於後妻而欲置子於法諒喻其父母曰  
昔夫子爲政誅少正卯而宥不孝以教令不明也今  
爾子有凶德乃吾屬教令之失非由爾民之罪也其  
父母感悟遂請釋之還爲孝子有民婦與夫兄有隙  
而縊殺其子姦人之婦而殺其夫匿其碑券強占民  
田盜米廩餘地以廣其居皆久訟不決一訊卽伏其

率歸其侵地而於負寃者尤力爲辯雪比至應天府  
事填委諒裁決如流案無留牘深水民素健訟一日  
投牒至八百諒視其虛實而異置之召訟者曰某也  
實某也虛虛則受笞實則待勘民願受笞者七八待  
勘者不一二焉其俗人死而利其妻者出棺斂之人  
已出棺復有以棺至者其妻欲嫁後至者用其棺而  
先出棺者訟于縣不直復訟于諒諒責令曰薄俗不  
能禁民死無所歸安用令爲乃杖出棺者以棺給貧  
民而歸其妻所親使俟終喪別適焉六合貧民與其  
弟妻同劫人三斛粟事覺當棄市公曰以三斛粟而

殺一家三人吾不忍也乃爲出其弟妻其人臨刑號於衆曰吾死無所憾但吾尹之德無以報爾句容有因人死而棄毀其屍者所司擬以支解入罪獄上諒不可曰死後棄毀詎可與生前支解同科爲輕減之先時堂鈔獨歸于尹凡有供需悉出衙郭二縣民不勝擾諒至一無所取分給僚屬之餘則儲以備燕饗饋贖又積其餘以爲工傭之費名曰公餘錢凡重建府治修葺廟學創立貢院皆取給於此旣而擢貳地官曾未越月綱紀秩然有未便者條陳於上苟益於時無所顧忌先是爲叅議時陳撫安軍民五事府尹

秩滿陳卹民十三事朝覲至京又陳便民九事 上  
覽疏嘉之多見施行歷官中外餘三十年門無私謁  
謝事而歸囊橐蕭然田宅讓諸弟姪別建居室少買  
田業治常產而家無綱紀之僕多自綜理暇則閉門  
焚香緝閱墳典課子姪業明經而已嘗道至訪以時  
事輒謝曰老耄無所與聞與守臣言無一語及私鄉  
人以請托至者拒絕之或以利動則曰吾後事具矣  
安用此爲其清節雅操至於老而不變如此

方 瑛

方瑛滁州全椒人曾祖銘洪武中驍將也官至留守

衛百戶祖信以戰功陞濟陽衛千戶父政靖難累功陞都督同知佩將軍印正統初進右都督征麓川領兵深入援絕而死追封威遠伯謚忠毅瑛以廕授金吾右衛指揮使論父死事功陞都指揮同知麓川賊首思任發益肆猖獗辛酉春上命定西伯蔣貴率師討之以瑛故將子嘗從其父領支兵殺賊有膽氣且熟其鄉道俾與貴同事瑛以此賊實君父之仇誓必勦滅師抵其境提兵先登卒平其地進都指揮使人皆嘆羨以爲方氏有子矣壬戌復從靖遠伯王驥征貢章沙霸河嶺諸蠻克之進後軍都督府都督僉

事丁卯春朝廷以瑛勇略兼人命克叅將將兵鎮守雲南時賊子思機發復據孟養以叛自將精兵擊走之獲其妻子象馬而還己巳夏宗州賊首黑番來等爲逆悉捕擒之還京進都督同知賞賚有加景泰初貴州東苗作亂圍平越興隆諸衛復命瑛將兵與兵部侍郎侯璉往平其賊遂進瑛右都督總兵鎮守貴州明年征香爐山諸寨悉平之復進左都督癸酉冬合四川兵勦滅草塘叛寇斬首七千餘級甲戌召還分總五軍營論平賊功進封南和伯食祿一千石子孫世襲給賜誥券明年專總神機營未幾銅鼓伍開

諸苗復叛佩平蠻將軍印總兵討之比至賊境獎勵諸軍指授方略克平四百餘寨誅擒八千餘衆賊屏迹遂留鎮湖廣貴州威德並行苗蠻聞風納款者甚衆天順改元進封南和侯明年東酋長僭稱僞號據險爲患分兵進勦直搗其巢穴破六百餘寨斬首一萬餘級俘獲八千餘人械送首首至京斬之又明年出勦都勻等處克平二百餘寨擒斬二千餘人惡黨殆盡餘皆竄伏內地悉平朝廷方將論功行賞而一疾逝矣訃聞賜祭葬謚忠襄享年四十有五

劉清



劉清字廉夫潞州人正統七年中應天鄉試第二登  
戊辰進士選庶吉士疎朗不羈爲文如流水下筆數  
千言立就已巳之變虜犯德勝門百官分地守禦凡  
三日夜清帥衛士督發甚勤拜兵科給事中巡視紫  
荆關口雅有威望事寧還朝是時行查山苗叛亂朝  
廷以清久在兵諳戎命佐都督毛福壽討之時禮部  
尚書童軒贈以詩曰明時仕宦作參軍 帝命南征  
慰遠人紫氣橫空金劍冷綠雲炫日錦袍新指麾雷  
動紅蓮曉談笑風生細柳春會看捷書馳報日定將  
勛業照麒麟於是進兵香鑪山常以所得廩賜頒將

士無不人人奮勵奏捷陞刑部右侍郎尋丁內艱奉  
詔奪情還部天順元年以事忤廷臣指左遷四川叅  
政卒年四十五

于 鏊

于鏊字器之號雲心滁州人正德戊辰登進士授戶  
部主事部送太倉銀十數萬給邊嗣部檄主守徐州  
倉以慎修聞庚午改授廣西道監察御史曰朋益之  
慶可榮鼎重之勝可懼也而御史之聲名乃著通歷  
三載奏最尋奉勅督長蘆鹽法兼視河道所至刻弊  
剔蠹風裁自持時薊賊楊虎等大掠河間諸郡縣勢

甚猖獗適駐滄州賊前驅猝至城下守吏遁去人情  
惶駭賊已登城蓋服朱衣坐臺中臺面城邇賊從城  
上望見相戒曰毋驚動欽差相率詣臺門乞命蓋諭  
以無留城中及殺人劫庫自非首惡並許自新皆歡  
呼羅拜而去命吏數輩招降數百人渠兇就縛後按  
巡宣大監軍廝養誘脅大戶包納率至乾沒公私受  
蠹廉知之掩捕十數人治其罪勒限令償上下肅然  
莫敢犯躡年代還有武臣獻其妹侍 武廟而憑籍  
寵靈緣爲奸利率衆御史攻之不報抗疏再陳至曰  
不韋進美姬而潛易秦春申成李園而卒傾楚明皇

龍祿山而幾危唐亦不報左都御史彭公慎許可獨  
器重焉令與張御史准看詳諸文字會大理寺丞缺  
員銓部欲擬鑿聞之急白彭公言故事官等當以俸  
差周御史倫實先于鑿階可弗越彭公歎曰君可謂  
虞廷之吏矣丙子陞浙江按察司副使浙爲大藩獄  
訟繁劇號難理初孝豐土豪湯毛等負險拒命積歲  
不服上命鑿同都御史張公津提兵克之有白金  
文綺之賜陞山東按察使會當路有銜以他事弗徇  
者爲非語中之遂調貴州貴俗龐厚莫有撓者甚安  
之嘗曰得行其志者其貴陽乎乙酉入覲意亦倦游

矣遂致仕時年五十有五時父南溪翁既八十翁之弟率菴居士亦七十有七皆白首康強歲時率弟姪洎子若孫殆數百指拜階下人皆羨以爲難得自筮仕至休致一廉自持比歸籬無餘貲已而貴陽舊僚致前未支俸七白金至付子弟令綱紀以贍生家始日裕乃買田左山之麓構屋其上雜蒔花木義興杭公淮額之曰上泉莊因自謂泉莊老農且爲莊之十四景各有標題徜徉瞻眺超然有舞雩之意且曰景外之景標題豈能窮哉南溪翁病侍湯藥如少兒既卒斂葬虞祥一如古禮比禫則年亦七十矣與鄉先

生爲清平會里居時絕不干謁然凡可以便民裨治者必告有司傾懷無隱問學務精詩文不事模擬而能道已所欲言尤究心六書之學平生精力健甚幾八十燭下猶能作蠅頭楷書以戊申春卒享年七十有九

戚賢

戚賢字秀夫號南玄全椒人當生之夕父夢天門洞開一兒從中躍下褰裳走抱覺而賢生少穎拔竒慧好讀書時全椒少文墨吏聞有少年多識字則逮爲佐書史賢則匿之他所至督學御史行縣乃自外潛

歸一試遂補邑諸生以嘉靖丙戌成進士授歸安令  
賢夙膺王文成之學恨不得執弟子禮至是遣使稟  
學王文成答之曰道在人心皎如白日雖陰晴晦明  
千態萬狀而白日之光未嘗增減變動從此悟入如  
掃雲霧而睹白日何暇他求乎自是身任其學居官  
行政一斷之心矢激弦絕不喻其果雖以此蒙訕賈  
禍不恤也其令歸安先平徭役以貧富爲等差轉輸  
者旣無重困更不復自隱匿簿書之暇入郊野問民  
何所疾苦其於豪右朝聞夕發芟摧不貸自謂縣令  
得近民除道以行失拊巡意斥去徒衛以二隸導前

卽市肆充塞一無所斂避也嘗未曙謁廟出河側聞舟中密語曰某被盜盜藏某所天且明遣人獲盜賊已具而被盜家方來訴控蓋素有心計善持算能持小物得人情實類如此邑有蕭總管者淫祠也豪右欲誣人者輒先賽廟廟壯麗特甚一日入廟中列賽者階下諭之曰天久不雨若能禱神得雨則善不爾廟且毀昇木偶置橋上禱數日竟不雨遂沉之於河又數日舟行忽木偶自水中躍入舟一邑譟呼曰蕭總管來蕭總管來賢陰令人伺于岸側曰水中人出卽械以來已而果然蓋諸賽者賄没人以爲之也朔



望謁廟畢與諸生講學爲言訓詁詞章不足以盡聖人之道擇其篤行者優禮之而斥其尤無良者郡守萬公雲鵬剛梗有聲數以事相忤至入計萬中浮言獨走吏部直其枉萬以得全一縣令入吏部留其郡守前後此未之見也丁繼母憂歸服除補知唐縣唐民愿而野瘠而艱食至則新學宮興弦歌簡徭賦清獄訟歲饑爲賑糶納券予粟約期來償禁酷逐伎民用不耗未幾徵拜吏科給事中與安遠侯柳珣冊立荆王餽遺一無所受虜寇陝西按撫上功罪異狀進賢爲兵科右給事中往勘之舉劾簡孚兵氣自倍擢

工科都給事中漕河淤墊請開范光湖月河以通運  
餉已復舉海內才望學問之臣十四人以進皆被廢  
與踈遠之人又向以講學取人怒者也於是羣謗競  
起左遷山東布政司都事請于巡撫曾公銑致仕以  
歸賢嘗自負意氣嫉惡如仇不能含忍然其好善赴  
急一出于性成無所矯強故凡引植善類提獎後進  
惟恐不及自爲縣以至入朝出使臨邊居家往來道  
塗率皆講學之日與人言皆以良知之說爲主執之  
甚堅而議論足以發之卽有持說不一者則曰吾聞  
之陽明先生其說如此反覆辨析不明不已也歸七

年而父始卒壽九十又十七年而賢卒壽亦開八袞矣

胡松

胡松字汝茂號栢泉滁州人嘉靖戊子領鄉薦己丑成進士授東平知州州有巨豪劇寇前守累不能收捕設法擒殪之民有訟必先諭之以理不得已方置於法故民莫不愛其惠而畏其威至構祠祀之秩滿遷南京兵部員外改禮部郎中松以部員冗職稍有餘暇卽聚經史求微詞與旨叅稽考互必決洽曉暢而後已且曰爲學如儲積然廣於收貯應用自不竭

矣陞湖廣叅議職糧餉值湖北叛苗鎮筸之變紆籌策親履行陣遂致蕩平捷聞特降璽書慰勞有白金綵幣之賜尋督學山西樹風聲明經術以儲實材爲天下用士類亦彬彬嚮風焉會虜入內地抄掠民倉卒奔避太原太原城堅閉弗納松憤然曰是非我赤子耶若何弗納弗納其奚用守爲守將懼遽納民民賴以全活甚衆於是遂上疏曰虜之敢於深入者以邊將怯懦失於先機故也賞罰不得當功罪不時審奸豪潛入虜地爲嚮道而莫之察帥臣隱控劔冒以捷聞而弗之究則備禦何由嚴而虜安得不深入

竊爲國家憂之謹上便宜十二事曰懲苟玩堅障堠  
懷攜貳蓄孽牧慎任使利器具廣間諜清耗蠹嚴備  
禦核屯戍預積貯撫傷夷疊疊數千言皆切中邊計  
要害 上可其奏卽擢叅政協守鴈門關松文臣也  
一旦起言邊事人固忌之而疏中語頗侵當時用事  
者以故得罪去家居築娛老堂奉二親別構尚友堂  
聚天下諸書讀之時與羅公洪先唐公順之入宜興  
山中盤桓究解務期脫然超解會言者以邊才薦拔  
起陝西叅政駐節平涼條奏數十事若嚴保甲均賦  
稅選伉健置常平大都可爲經久計者轉浙江按察

使尋遷左右轄時將吏多翫法侵尅軍食儻侍按發其賊至巨萬人心肅然擢副都御史巡撫江西適流賊豕突殺長吏率浙兵千餘人倍道出賊不意悉殲之因議曰豫章爲閩廣下流當受其衝莫若於要地增置城濠屯戍守先事而待之復減租稅理冤獄舉賢良黜貪墨民得蘇息立石頌德焉始廢西賊帥張璉者黠慧獷悍爲諸酋最其巢穴連諸洞寨驅羣蠻時出寇抄邊郡苦之諸路連兵征討數歲不能克至是悉平松之功爲居多云陞兵部侍郎拜吏部尚書獎恬退抑躁進擢用才儻以報稱德意未幾疾卒

徐州

朱守仁

朱守仁字元夫徐州人幼有大志好讀書落落自豪  
視輩行岸然罕所推接元末兵起江淮鼎沸應州辟  
累獻竒謀破羣盜歷官至樞密同知守舒城甲辰王  
師攻廬州守仁知天命有在舉城附大將徐達陞見  
太祖嘉其樸茂無華授中書斷事乙巳以袁州初附  
命知郡事值郡治新設瘡痍未瘳守仁禋身廉潔撫  
字有方始終恢廓無畦畛民多德之洪武二年徵拜  
工部侍郎越二年代安然爲本部尚書尋改北平行

省叅政又以餽餉不繼謫蒼梧知縣九年進知容州  
尋改知高唐州俱有善政十年以幹治聞起四川布  
政使時全蜀甫定奸伏易煽守仁威令簡嚴錮酷吏  
懲無良郡邑化之爭以惠利顯未及一考以疾致仕  
十五年雲南平改威楚開南等路宣撫司爲楚雄府  
上念漢楚雜處非得老成持重者不足以鎮之特起  
知府事至則招集流移授以田土量民貧富均賦徭  
役無偏累又肇建學校隨才曲成有強梗不馴者懲  
以漢法歷九載境內大治及計績來朝闔郡保留不  
獲垂涕而送之二十三年廷見會監牧日蕃太祖



留心馬政以守仁舊臣練達特拜太僕寺卿首奏准都督府等衙門各立草場俱於江北易泉潯州等處牧放馬匹所轄十四監九十八羣克舉職業孳息日盛屢荷賞賚有所獻納無不俞受二十七年聽致仕永樂二年疾卒

### 高遜志

高遜志字士敏蕭縣人元末僑寓嘉興好學嗜文其爲文深醇雅則成一家言年二十五爲鄧山書院山長洪武二年徵修元史入翰林爲編修累遷侍講學士革朝庚辰會試禮部尚書陳迪侍中黃觀知貢舉

遜志以太常寺右少卿與董倫爲考試官得吉水王  
良常熟黃鉞莆田陳繼之廬陵胡廣崇仁吳溥建安  
楊子榮新淦金幼孜石首楊溥武進胡濙太康顧佐  
時稱得人同較藝者右拾遺朱逢吉編修史官吳勤  
葉惠仲趙友士徐旭張秉彝監試御史王度俞士吉  
亦一時之選壬午之變王度葉惠仲死難餘順命顯  
庸遜志存沒無可攷見殆晦迹終身挺節不汙於時  
耶

黃政

黃政徐州碭山人洪武中爲邑吏十八年以直言徵

奏稱 旨擢都察院右僉都御史彈劾不避權要  
年以事件 旨黜爲英山縣吏及金山寇起求能討  
平之者或以政子琰聞徵琰至對曰臣年幼才弱不  
及臣父知兵召還復職卽日辭闕渡江募勇敢士得  
十餘萬人遂討平之尋陞本院左僉都御史二十二  
年命討雲南叛夷設法招撫隨降服還至普安遇賊  
中傷而卒

孟 驥

孟驥蕭縣人洪武初以才能舉累官禮部郎中治績  
書最陞河南左叅政益練達政務遷四川左布政使

任滿夷民不釋復增秩留之後致仕

任蕭

任蕭徐州人洪武中以鄉貢擢工部主事歷郎中時營繕官殿事竣陞南昌知府政績卓異廉譽著聞遷雲南左叅政致仕

山雲

山雲徐州人父青以靖難功官至都督僉事雲襲爲金吾左衛指揮使從太宗北征有功累陞都督僉事宜德間佩征蠻將軍印鎮守廣西時峒峒峒獠叛服不常雲率兵往討一鼓破之賊退保山巔山皆險

峻草木蒙密賊以木掛于藤壘石其上官軍至輒斷藤木石交下無敢近者雲營山下於夜半束火牛羊之角而縱之賊謂官軍至矣亟斷藤比明木石皆盡官軍鼓譟登山遂破賊壘斬首數萬級招降并還所掠甚衆乃增築四城九堡傳舍九十餘區以鎮要害自是終雲之世十餘年間猺獞無敢爲孽者以功陞都督同知繼陞右都督及病 上遣醫視療慰勞甚至正統三年正月卒賜祭葬贈懷遠伯謚忠毅厚恤其家命其子俊襲爲府軍前衛指揮使廣人悲號立祠塑像祀之雲沉勇廉潔便騎射臨敵多奇策馭下

嚴明而善撫恤之人樂效死所至成功先後鎮廣西者多利土官餽遺惟雲分毫無取土人畏其約束無敢少爽至今廣人論賢將必稱雲云

甄實

甄實沛縣人永樂初鄉貢歷官湖州府同知秩滿以績最陞太僕寺少卿益著勤能尋遷四川左布政使致仕

馬榮

馬榮徐州人少習武事有膽略永樂中從征北虜所向克捷累功至右都督追封景城伯謚壯武

陳敬

陳敬礪山人膂力兼人嫻于武略永樂中從 駕北  
征累立戰功官至中軍都督僉事鎮守山海永平等  
處撫馭有方軍民懷服

權謹

權謹字仲常徐州人永樂丙戌以主事呂寧薦爲樂  
安令廉明仁恕爲山東諸郡邑最秩滿轉光祿署丞  
母病躬湯藥弗效叩首籲天求以身代母愈年九十  
終比葬躬負土封樹廬墓三年孝感泉湧兔馴之異  
永樂二十二年有司以聞命馳驛赴闕又命以其事

狀朗誦大廷示百僚拜文華殿大學士謹辭弗稱

上曰朕之除卿嘉其孝以風天下之爲人子者他非卿責也時恭祀 文皇謹獨哭之哀 上嘉賜牛羊

脯醢果餌隨侍 皇太子監國留京得輔導體宣德

元年以疾乞歸進秩通政司右叅議賜白金文綺聽致仕仍勅禮官旌其門謹旣歸崇道敦德終始不渝正統中卒子倫字民衷領永樂丁酉鄉薦學行修明養親二十年親終隱居教授不仕倫子宇亦篤孝道倫年九十病臥宇侍湯藥寢不解帶旣卒葬廬墓負土種樹成林晨昏哀泣母卒合殯亦如之州守以聞



旌表其門謹以孝表儀朝著倫宇籍其禮教舉之時  
人咸稱權氏有世德云

王 弼

王弼徐州人永樂中歷官良鄉知縣良鄉路當要衝  
事極繁夥弼處之皆得其宜踰七載當代去民詣闕  
懇留弼益勤政不怠歲大旱躬禱卽得雨有蝗入境  
復自祈之爲羣鳥食盡民皆歡戴尋遷戶部主事

蔡 楫

蔡楫沛縣人舉孝廉爲嘉興知縣初至官出滯囚二  
百餘人勸率富民納逋糧四十八萬有奇縣多亡賴

楫於縣廳置善惡二牌民有善志之有過惡弗率教  
令亦志之由是民感愧皆趨善而去惡擢監察御史  
董伐材于江西屢疏民疾苦以聞陞浙江僉事正以  
率下而寬猛適中其卒也人多思之

張宏

張宏碭山人天性孝友勤於問學永樂中授開封府  
同知轉戶部郎中律已廉潔苞苴未嘗一至其門出  
知荊州府政務旣舉所守益勵門絕私謁號閉門張

和州

華高

華高舍山人初以舟師從征累官湖廣行省平章政事天下已定論功封廣德侯後命往巡海南諸城卒于瓊州訃聞朝廷憫其無子詔納鐵券于墓中追封巢國公謚武壯

徐義

徐義和州人也初從平章也先帖木兒後因靖海侯吳公來歸相率渡江克太平定建康授領萬戶軍吳嘗以力戰創甚命義代之撫其背曰繼吾志者汝也義爲子弟時慨然有大志不管志產業剛毅正直膺力過人好讀孫吳書意有所合則撫卷而喜平居以

騎射擊劍爲樂至是戍守江陰施設布置人咸異之  
吳元年從征僞吳張士誠每戰能躍馬揮刀作虎吼  
入其陣衆皆披靡決戰之際雖矢石交集血流至踝  
弗顧也卒成其功繼克明州福城延平還定昌國拔  
蘭秀二山洪武元年授昭信校尉江陰衛百戶三年  
陞武略將軍汝寧衛副千戶從信國公克瞿塘進取  
西蜀五年復從岐陽王北征沙漠奮勇深入擒獲甚  
衆又能撫恤士卒與同甘苦故得其死力而功能益  
著十一年授明威將軍建寧右衛指揮僉事號令整  
肅權禦有方繕修力役勞逸適均人心悅服二十一

年春得疾甚劇卽却藥曰死自有命豈醫藥所能療耶顧其子信曰汝等當忠以事主正以率下勇以禦敵仁以撫衆則臣子之道盡矣言訖而逝享年五十

### 李隆

李隆字彥平和州人年十五襲封襄城伯雖甚少而氣槩英偉上深器重之永樂庚寅以來每六師北伐輒分領兵扈從其應機發策出奇取勝雖老于行陣者亦讓其能上益竒之以爲可大用丙申車駕臨北京命隆留守南京仁宗卽位命總兵鎮山海凡東北邊關皆屬節制威望著聞虜酋震懾未幾

復還南京洪熙宣德間屢有白金文綺之賜眷注甚篤隆在南京十有八年荷列聖知遇褒嘉寵待所賜勅前後幾二百道隆於小大之務必盡其公威行惠施近悅遠懷人雖有貴賤愚良寬鄙細粗不同皆敬愛之如父母召還之日自都城至江上泣而送者相屬于路隆雖總理軍政然謙已下賢務循大體不苟爲異同有司黜民丁隸府軍往督府與兵部再閱之不中選者例有罰隆曰彼出自田里兵非素習然方壯顧教練何如教練有法則怯可勇勇可使爲精兵由是鮮有罰者丙寅命率師巡邊賜之鈔幣及寶

刀一曰軍事貴嚴寶刀之賜意其在此然威令素著  
臨邊中飭守備內外整肅訖還不戮一人朝廷或有  
政刑疑未決命文武大臣廷辨之隆侃侃正言犁然  
當于人心士大夫益重之間居手不釋卷古聖賢之  
言行皆服行不怠祿賜之外不妄取一錢嘗刻漢疏  
廣及唐盧坦之言以貽世訓諸子曰吾襲父爵四十  
年幽遠之情固多未達所行之事寧免過差然兢兢  
惕勵悔往修來不敢欺公貪墨以負朝廷付託之重  
爾等其力勉之正統十二年薨時年五十有五

耿定

耿定和州人宣德中以薦辟授官刑部郎中有能譽  
陞浙江叅議尋陞本省布政司叅政正統十年處州  
盜起定領兵勦捕率先督戰陷陣而死事聞贈按察  
使遣官諭祭

馬應龍

馬應龍字公濟和州人弘治乙酉中鄉舉第二正德  
辛未登進士除戶部主事值流賊劉七等寇河南  
上命文武大臣討之命督餉以給軍事賊平賜銀幣  
勞之踰年蜀盜尚未平於是命都御史彭公澤西征  
仍以應龍叅軍督餉未幾彭公乃以延綏臨鞏洮岷



兵馬付應龍自爲一支遂有中江之捷斬首數百兵  
勢漸盛後至漢川賊突至城下奮然提所部兵往勦  
之大戰於三渡水親斬劇賊一人士卒奮擊所向披  
靡斬獲幾四百餘級而中多渠魁於是軍中皆以文  
武全才目之捷上再賜銀幣陞俸一級班師後又督  
糧宣大乙亥陞郎中尋奉勅總理遼東糧儲收支有  
法正己格物積弊若洗居一年軍民胥悅信畏若神  
尋以病乞歸調理 上許之居鄉三年所學益進比  
辛巳復除本部郎中至京數上言邊事 上允行之  
嘉靖元年陞山東按察司副使整飭霸州等處兵備

正德以後浸爲盜藪地又多中貴洎勲戚庄宅士無完器食無積粟豪家兼并侮法吏不敢捕桀民肆掠邏不能獲至則肅貞憲度振揚威武創修城池建置營堡大易舊觀於是汰冗憊選精壯得勇敢千人給以利器厚以糗糧訓以坐作養以銳鋒又積粟萬二千餘石以備緩急不數月間石杲房景玉陳奎梁臣等大盜七百餘人洎窩主盧進胥銳二十餘家先後俱獲而姦豪白鉞白景方等處以重法不通請謁由是民志惟熙吏守不盭其他明寃獄摘隱昧不可勝紀民皆設位祠祀於家巡撫都御史孟公春以治狀

上聞有蝕金文綺之賜宿有疾疾在霸州五年公事  
旁午間作間瘳逮丙戌章九上乞歸 優旨不允冬  
十二月疾劇忽有四川按察使之命而竟不起矣

廣德州

錢用任

錢用任廣德州人元末進士爲翰林院編修張士誠  
據吳用爲淮南省叅政乙巳冬王師下淮揚率城歸  
附授按察司副使尋遷中書省叅議吳元年改御史  
臺經歷進奉訓大夫尋奉命裁定律令洪武元年陞  
禮部尚書秋八月遣官釋奠於先師孔子用任等奏

周制凡始立學者釋奠于先聖先師凡學春夏釋奠於先師秋冬亦如之漢春秋合樂則天子視學有司總祭先聖先師是則漢時釋奠亦略可知矣魏正始中使太常釋奠於辟雍晉釋奠皆於國學東晉成穆孝武皆親釋奠隋制國子監每歲四仲月上丁釋奠先聖先師州縣學則用春秋仲月唐初釋奠儒官爲祭主直書博士姓名敢昭告於先聖許敬宗奏請令國子監祭酒爲初獻詞稱皇帝謹遣仍令司業爲亞獻博士爲終獻縣則令爲初獻丞爲亞獻主簿及尉通爲終獻永爲禮制武德貞觀中皆以二月親幸國

子監釋奠開耀景龍中皆皇太子釋奠於太學開元  
中詔春秋釋奠以三公攝事著之常式若遇大祀則  
仲丁州縣用上丁宋元因古禮而損益之今寔定制  
以仲春仲秋二上丁日降香遣官祀於國經以此相  
初獻翰林學士亞獻國子監祭酒終獻 上然之至  
是遣官致祭本年十二月乞休賜居湖州

陳翼

陳翼字良輔廣德州人父興洪武中累戰功世襲指  
揮僉事翼從 成祖舉靖難師累立戰功陞鎮國將  
軍陝西都司都指揮同知尋命掌金吾右衛事永樂

己丑扈駕還北京進階中軍都督府都督同知後二年數將神機營軍馬扈巡迤北至和林擊斬胡寇瓦剌人畜殆盡後七年詔總南京督府視事洪熙改元召還北京未幾有疾給醫藥調治久之不能起宣德三年卒壽六十有三上聞訃給喪具道里費勅有司治葬從一品制自襲斂至祥禫諭祭者四翼神觀高偉聲如洪鐘讀書善騎射以才氣自負爲將矜而不肆嚴而有恩又能先幾倡勇制變履危戰勝之日務以吊殘恤寡爲事未嘗妄殺一人故士卒樂附所向成功不遜古名將云

胡 廩

胡廩字致恭廣德州人年甫一紀而失怙母淑人口授孝經論語輒能通大義出從邑博士授經重以慈訓之嚴刻苦就學母沒廬墓三年永樂初升太學歷事內廷擢工科給事中嘗攝通政司事 太宗每嘉獎之九載陞交趾按察僉事 仁宗以其久任近侍特留之擢都察院右副都御史宣德中出師征交趾命督廣東漕運復命往巴蜀督軍民採材木既還改授福建右叅政秩滿以老疾致仕廩居近侍每有建明同列多推讓之職都憲奉法嚴謹風紀以振督運

廣東採木巴蜀措置有方人不勞而事集其在閩藩蒞事尚寬簡吏民懷之所至有施設蜀民貧者親死多暴露命從儉葬之福州城河久湮廢不通舟楫命䟽之建伏波將軍祠創程明道先生道南堂凡可以化民勵俗者靡不用心致仕居鄉里以睦族教子爲事正統庚申以疾卒享年六十有八疾亟呼諸子侍側索紙筆書二詩以訓戒之

李崇謙

李崇謙字孔濟號松渠廣德州人生而穎敏孩時聞人讀書輒能記憶以問其父昭父大奇之後隨父叅



軍楚之蘄陽父卒于官時年甫十二卽能哀毀備之  
千里扶襯犯洪濤而東竟得無恙抵家閭閉嘖嘖稱  
之母馬夫人以其父卒於官戒勿讀書每置書輟焚  
之年將弱冠泣對母曰男子當置身立名營業不朽  
兒不讀書可柰何聞勾餘韓君應龍奇士也授經于  
郡南之戈村負笈從之韓君一見知其器宇嵯巖不  
類庸俗曰吾將託墜緒于此人豈僅僅一朋聚之爲  
快乎於是悉底裏相示靡不劔映者韓君大魁于嘉  
靖乙未榜而崇謙亦於嘉靖丁酉發魁南畿因母老  
善病弗忍遠離屢不赴舉春官尋令浙之分水多惠

政民尸祝之稍遷爲豫章吉州別駕母畏長江之險弗克迎養遂謝命不行萊彩之暇一以課兒輩引進後學爲事中丞李得陽其長子也忠孝性成標格莊峻與真菴濮陽先生涑以道誼氣節相砥亭亭直上實桐土之翹楚焉入鄉賢祠

濮陽涑

濮陽涑字致東廣德州人端方正直不愧形影中嘉靖丁酉科凡十二上公車適典試者爲涑內姪故不通謁曰吾不敢以攀附愧科名旣而有以年誼欲授以京秩者斂容謝曰筮仕不正何以正人椒山楊公

西市之慘人人辟易獨素服往哭之其生平氣節類  
如此初以母老不仕母終就選南昌別駕凡三署邑  
符操勵懸魚治去害馬時花園積寇猖獗乘間布方  
略親搗其巢穴捷聞奉 欽賞羨餘毫不染指積穀  
備賑亡何大祲全活數萬人先是豐城有劫庫之變  
橫及無辜力爲申救尋獲真盜所全百餘家比致政  
杜門養重絕迹公庭至事關大體則又慷慨身任之  
如建平攀州馬政又如欲議轄州于府闔郡惴惴不  
保生聚皆首倡率衆援 祖制陳利害力寢之空齋  
習靜悠然會心所著有四書貞義禮記貞義韻學大

成圖書性理訂疑行于世更著家規如千卷一繩子  
弟以禮卒後章民追思俎豆于名宦祠又逾年州人  
士請祀于鄉仰止公評至今傳頌如一口云

姜 洪

姜洪字希範號敬齋廣德州人束髮卽警悟家貧力  
學嘗以布貿得假銀歎曰人以欺我我豈可以欺人  
哉擲之水中成化乙酉薦鄉書戊戌登進士除盧氏  
縣令以禮教民嘗單騎勸農并教之紡織以裕布帛  
誅不孝以正綱常縣民姜仲禮願以身代父大辟特  
與奏免之徵入爲貴州道御史邑人感泣建祠尸祝

焉 孝廟登極疏時政八條多見採納及按湖廣值  
歲饑所賑活無算楚藩吉王 憲廟親弟也請益莊  
田洪疏其不可事竟寢楚中漕糧以十萬計歲歉轉  
輸爲艱與總漕辨甚力坐貶山西夏邑令治行一如  
盧氏轉桂林知府討蠻賊陞滇南大叅時土官陶洪  
與八百媳婦約爲亂洪乘間撲滅尋執其麾下楊炯  
斬戮以徇明年洞蠻來寇 上命合兵討之桃古悉  
平正德丁卯轉山西布政闈宦劉瑾擅權求賂于洪  
洪弗與落職歸里門日以荷鋤把甕爲樂若忘其爲  
貴顯也已而瑾伏誅起山東左布政陞右副都御史

提督鴈門關兼巡撫山西頻行惟收月俸六石病革  
至無能爲餐以告三司衆皆墮淚曰予輩可以無給  
乎洪慨然不悅竟卒洪歷仕四十載囊無錫幣門無  
垣墻真清白吏云

李天植

李天植字性甫別號冲涵廣德州人自博士員輒有  
公輔望聞文成良知之說恍如夙解復從鄒文莊諸  
先哲商證融徹丁卯薦南都禮記第二人辛未成進  
士楊公博典選事有知人鑑偉視公曰是望而知其  
正人敢以惠吾鄉授平陽司理奏績治平天下第一

徵拜吏科給事中疏數十上皆天下大計時江陵相當國奪情議起排衆昌言曰異日謂羅一峰何如人遂大忤江陵無何鄒公元標趙公用賢各具疏忤

旨杖斥卽上疏論救備極詳懇江陵恚甚計中之無何有旨選淨身男子若干人又力陳儒生進學數少中貴選用太盛兩事倒置語攻政府益急遂借年例出分守江西饒南時議毀天下書院當事者希相臣意欲併廢白鹿洞膳田力持不可且捐餼增益之羣諸生講習其中所興起甚衆閱二歲遷湖廣副使鎮長寶二郡癸未楚地大饑日夜籌畫捐新俸佐以

贖鏹所全活無量尋叅蜀將發士民號泣如失父母  
爲尸祝碑碣紀永思者楚地如林會御史任養心緣  
與官臺省時議不合盈章肆詆意陷嚴譴司寇耿公  
定向諫議鄒公元標辨其誣廷議寢疏不報諸臺爭  
不直御史竟落二級甲午被命飭兵曹濮適曹單二  
令爲部民所訐當道欲遽褫令職以謝要人復持辨  
不可因忤當道卽扁舟南下抵里杜門返初服第以  
庠中增膳事力請當道竟如其議比天子有事朝  
鮮詔廷臣舉憲臣有方略者臺省累疏首薦自以年  
屆七十絕口不言當世事矣戊戌秋卒于里第年七



十二生平著述甚富晚更喜易偶拈一二語輒盡消  
息盈虛之變遺文如千卷其舉業諸書有禮記哀言  
行于世

夏良心

夏良心字宗堯廣德州人隆慶辛未進士歷官副都  
御史巡撫江西廣信銅塘山亘閩浙延袤七百里故  
劇盜鄧茂七藪向奉 旨封禁璫誤信爲曠疏請開  
良心謂是役也害叵測而非可口舌爭乃繪山箐險  
瘠爲圖疏不可者十以上復授意郡守俟璫勘時理  
諭勢禁璫遂意折疏上乃爲報罷并罷泰和武山石

膏役已復置義倉貯穀二萬石置義田二百七十餘畝備賑後值歲大祲有司取以供正賦他如覈保甲申錢禁汰冗兵減芻從懲悍宗所爲地方計不遺餘力比六載考績陞兵部右侍郎照舊巡撫逾年病病時口授遺疏惓惓以稅使未撤佚賢未起爲言遂卒按臣徐元正請卹典西章人環聚而祠之并乞祠額得旨贈兵部尚書予祭葬仍加祭一壇祠名哀德先是爲諸生時佐其父市稔田百畝以振族窶歷宦幾十年其所俸入僅充食指復置田百畝以廣先人之惠生平端肅沉毅言笑不苟卽燕衍寢處子弟肅

侍儼若朝典居家不附要津不結儔黨範我馳驅循  
彼周道真儒良弼何以加焉

補遺

劉愷

劉愷字伯和滁州人天順元年進士由南道御史丁  
憂復除河南道建言降瀏陽縣丞陞石首知縣薊州  
知州福建僉事致仕

周冕

周冕滁州人中正德丙子鄉試授新安令時洪水泛  
溢民居漂沒殆盡冕百計設處築障水堤數千餘丈

本朝分省人年表 卷四十一  
民始免于墊溺擢南京陝西道御史風裁嶽嶽抗節  
直言摘伏發奸不避權貴中外憚之奉委權稅國課  
不虧商民感德又奉查各衛屯田明界址清壩占前  
後所疏數十萬言踏勘紫沙等處廣流親抵其地設  
法清丈不畏強禦歷年宿弊剷剔以忤當道出  
知鶴慶府遂不赴任飄然解組而歸

邵夢麟

邵夢麟滁州人七歲授書里塾每至閔子比干章輒  
潸然流涕常書其座右云士君子立身當忠孝廉介庶  
不忝乎所生登嘉靖己未進士初授大理評事扶繼

母柩歸舟沉棗林間涉水扶襯幾爲所溺僉憲河南清屯田數萬頃置兩驛以甦民困叅議浙江剔蠹釐奸貪墨解綬倭寇溫處親督兵禦之生擒倭酋馬打一等督學江右加意行檢文崇典雅一切請托不行改山東叅政抵任七日而卒囊橐罄然無以爲殮

王宗顯

王宗顯和州人以明經中鄉舉避元亂僑居嚴州越國公胡大海克嚴州得宗顯薦之知寧越府事首開郡學延儒士葉儀宋濂爲五經師時喪亂之餘學校久廢至是始聞絃誦之聲復加意撫循扶衰起瘠二

年之後殷然成富教之俗焉

呂盛

呂盛建平縣人正德己未進士授義烏令廉明有爲政聲茂著擢南戶曹歷遷山東副使兵備天津武廟南巡適當孔道且時方饑饉百計支吾復出無碍官銀日給流徙之民俾之就食給醫藥以療時疫改雲南叅政卒于官東人感德立祠于龍潭灣